

EFESIOS

Yi Neczy Huidibi San Pablo Yajniguejx Je Mibijcpidijc Jim Efeso

1 Hich Pablo, Dios jadu'n tzojcp co Jesucristo ti xyajni'bi'cyich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtip, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ²Huen ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugühuip ajcxy.

Nej je Espíritu Santo conucxy Cristo yjäy

³Tzoc iibaatim capxpaatim Dios iich ajt nHuindzin Jesucristo yTeedy. Miid co nyajpaatim ma Cristo, paady Dios ti xyconuucxim miid tüg'óciy huidijaty tzomb tzajpjoty. ⁴Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jëbi nyajpaatim ma Cristo, etz jigix jëbi nyajpaatim ma Dios yhuinduu huädz oy njot nhuinma'ñ, ca' ti bocy nmiid'ajtim. ⁵Miid co Dios ooy xychojcm xyjihuiiyim, paady ycixp yi' capxcödujcy jecy'ajty, ca'ni anajty naaxhuiñybi

yajcojy yaj'oyi'y, co xycöbigaanim nejjihuüy yci'm y'ung. Co Dios jadu'n quejxy je Cristo ya naaxhuingíxy, chi yi' yaj'oyi'y nej jëbi xycöbijcm nej yci'm y'ung, e jadu'n xymiid'adaanim tzajpjoty. Dios jadu'n ytuñ jadu'n nej yi' anajty tzocyin. ⁶Tzoc iibaatim capxpaatim Dios ooy miid co mijmay'ajt mij'oy'ajt tuuñ miid iich ajt ycixpi, co quejxy y'ung ya naaxhuiñ miid iich ajt nbocy ycixpi, jigix jëbi nyajpaatim ma yi' y'ung, je' y'ung huidibi ooy tzocy jihuüy. ⁷Miid co Dios ooy xychojcm xyjihuiiyim paady ycixpi yi' y'ung ñi'py teemy yojcy co y'o'cy miid ajt nbocy ycixpi, ti ajt n'alma xyajni'dzoocim etz nbocy ajt ti xyhuinmeecxim. Co jadu'n ytuuñ, chi Dios mijmay'ajt mij'oy'ajt tuuñ miid iich ajt ycixpi. ⁸Co Dios jadu'n mijmay'ajt mij'oy'ajt tuñ miid iich ajt ycixpi, ti xyajhuinjihuiiyim ti xyajnejhuiiyim yi ytiy'ajt yi yhuinma'ñ. ⁹Dios yjäygidacpy jadu'n co ti xyajnejhuiiyim nej anajty miidty capxcödujcy huidibi ca' pin jecy'ajty huinjihuüy. Nañ

jadu'n Dios ti xyajnejhuiiyim nej ti yhuinma'ñypidacy jecy'ajty nej ytuna'ñ anajty miid Cristo.

¹⁰ Je huidibi Dios jecy'ajty ti yajnihuinmayi'y co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayi'y anajty co pidäga'ñ tüg'óciy huidi yajpatp tzajpjoty etz tüg'óciy huidibi yajpatp ya naaxhuiñ ma tüg ane'min, e je Cristo je' ane'mamb nigohuajc'adamb tüg'óciy.

¹¹ Tüg'óciy tijaty tuni yjajti jiiby tzajpjoty etz ya naaxhuiñ Dios jayijp capxcöduj. Hich ajt huidibi nyajpaatim ma Cristo, Dios ti xyhuin'ijxim jecy'ajty co oga'n je naaxhuiñybi chondacy jigix jëbi nbaatim tüg'óciy huidibi Dios xymöhuaanim. E tüg'óciy jada nicxy yjaty tim jadu'n nej Dios jayijp capxcödujcy, e Dios ytumyb jadu'n nej yi' tzocy etz nej jäygidägy. ¹² Jadu'n Dios cuydumyb miid ich ajt ycixpi, huidibi jayijp ti nmibijcim ti nmijpidaacim Cristo, jigix jëbi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios miid yi' ymij'ajtin etz yi' y'oy'ajtin ycixpi. ¹³ Nañ jadu'n miich ajcxy co mmidooy je ayuc tiy'ajt nej jëbi m'alma ñidzögipy ajcxy, e ti mmibijccixy Cristo, huin'it ajcxy myajpaatcixy ma yi', e je Dios yjihui'ñ ymic'ajt huidibi miich ajcxy miid ma mjot mhuinma'ñ, je' nidiy'ajt'ajtp co myajpaatcixy ma Dios. Jada je' je Espíritu Santo huidibi Dios y'ahuaniy jecy'ajty co xymöhuaanim. ¹⁴ Jada Dios yjihui'ñ ymic'ajt jada je' nidiy'ajt'ajtp

co nbadaanim it lugar ma Dios y'it. Dios xymöhuaanim it lugar ma yi' y'it co anajty xii tiempo yhuaad'ajtni huin'it Dios nihua'na'ñ yajñidzöga'ñ pinjaty yjäy'ajtip ajcxy. Jadu'n Dios tuna'ñ, jigix jëbi ich ajt n'ihbaatim ngapxpaatim Dios miid y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cuje'ajt

¹⁵⁻¹⁶ Com ti nnejhuiyich jadu'n nej tiydudägy miich ajcxy ti mmibijccixy ich ajt nHuindzin Jesús, e nañ jadu'n ti nnejhuiyich jadu'n nej mdzojccixy mjihuiygixy tüg'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidacim ma Dios miid miich ajcxy ycixpi. ¹⁷ Mibijctzooybich Dios, nHuindzin Jesucristo yTeedy, je mijpi Dios Teedy, co yi' xymöhuip ajcxy je huinma'ñ je ixpijcin huidibi je Espíritu Santo yejcpy, etz nañ jadu'n xyajnejhuihuipy xyajhuinjihuipy ajcxy jac'oy yi' y'ayuc, e tüg'óciy nej yi' ti ytuuñ. ¹⁸ Dios nmibijctzooybich miid miich ajcxy ycixpi, co xyaj'aniyip ajcxy mjot mhuinma'ñ miid yi' ytiy'ajt, jigix jëbi mnejhuiygixipy tijaty huidibi ajcxy m'ahuijxyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jëbi mnejhuiygixy nej ymijity yjanchity je pidägy huidibi Dios yegamyb miid tüg'óciy ajcxy huidibi Dios yjäy'ajtip. ¹⁹⁻²⁰ Dios nmibijctzooybich jigix jëbi ajcxy mnejhuihuipy jadu'n nej Dios ymic'ajt miidity. Je' ymic'ajt ca'

ycixipy ytigoyipy, e ni pin ca quipxipy. Etz yi' ymic'ajt tumb ma iich ajt njot nhuinma'n nidüg nidüg co ajt nmibijcim. Dios ti xyajnejhuiiyim yi' ymic'ajt huidibi ymiid may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jilby tzajpjoty. Yi' iñaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxyi miid Dios. ²¹Cristo jac mij'ane'min ymiid, jac mic'ajt miid, ca'ydi jacpinjaty huidibi jayajpatp tzajpjoty, etz huidibi jayajpatp ya naaxhuiñ, huidibi cham tzinaayb etz huidibi jacjiini tzinähuaamni. Jesucristo cömay y'ity nigi, ca'ydi jac pin huidibi cham tzinaayb, etz huidibi jacjiini tzinähuaamni. ²²Dios ti pidägy tüg'óciy ane'min ma Cristo jëbi ane'mdäy. Jadu'n nipaady nej jihuüy Cristo niñhuäcpejtäy tüg'óciy ane'min. E nañ jadu'n Dios ti pidägy Cristo jigix jëbi nigohuajc'adipy tüg'óciy mibijcpidijc. ²³Je mibijcpidijc jadu'n nipaady nej Cristo ñinixc, paady ycixpi yi' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'pxtaayb tüg'óciy tijaty ji ajtp.

**Dios chojepy yjihuiyb jäy ajcxy,
paady ñidzoocixy y'alma**

2 Ca'ni miich anajty ajcxy mmibijccixy Cristo, ooy anajty mdundigooygixy miid Dios ytiy'ajt, ooy anajty ajcxy mbocymiidity, e jadu'n nipaady nej jihuüy ti m'o'ccixy miid mbocy ajcxy ycixpi etz Dios xyajjugypijccixy huiñjemy miid jemybi jugy'ajtin.

²Co ca'ni anajty miich ajcxy mgöbijccixy mmijpidaaccixy Cristo, ooy anajty mguydungixy naaxhuiñjäy ajcxy ytiy'ajt, etz nañ mgapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma yi jäy ajcxy yjot yhuinma'n huidibi ca' capxymidoogixy Dios.

³Ma je tiempo tiibi ñaxy, nañ jadu'n anajty ndzinaayim jadu'n nej yi jacjadyii naaxhuiñjäy ajcxy huidibi capxymidoob yi ca'oybi. Ngapxymidoohuim anajty nninixc chojcin. Ndundigooyim anajty miid ngi'mjot ngi'mhuinma'n. Nguipxyiyim anajty miid yi jacjadyii naaxhuiñjäy ajcxy huidibi Dios tzaachytunaanip miid ypocy ycixpi, etz nañ jadu'n nmihuaad'ajtim co Dios xychaachytuunim miid ajt nbocy ycixpi. ⁴⁻⁵Oy ixipy iich ajt mihuaadity tzaachypi miid ajt nbocy ycixpi, per Dios mij ooy ti xypa'ayoohuim, e mij ooy ti xychojcin ti xyjihuiiyim, paady ycixp tuuñ may 'ajt miid iich ajt ycixpi co yajjugypijcy je Cristo. E jadu'n quipxyi miid Jesucristo iich ajt nbaatim jemybi jugy'ajtin huidibi ca' ycixipy ytigoyipy ni mina. Jadu'n Dios may'ajt tuuñ miid iich ajt ycixpi co anajty nbadaanim o'cin miid ajt nbocy ycixpi. Miid co Dios may'ajt oy'ajt tuuñ miid miich ajcxy ycixpi, paady miich ajcxy ti mbatcixy jemybi jugy'ajtin huidibi ca' ycixipy ytigoyipy ni mina. ⁶Com jadu'n nipaady nej Dios xyajjugypijcim quipxy miid Jesucristo, paady ycixp Dios xymöhuaanim it

lugar jiiby tzajpjoty quipxy miid Jesucristo. ⁷Jadu'n nej xii tiempo mimb cidacp Dios jadu'n oy tuñ jigix jëbi tiy'ajt nmiid'ajtim jadu'n nej Dios xychojcm xyjihuiyim etz xypa'ayoohuim mijcajee, etz mijmay'ajt mij'oy'ajt tuun miid iich ajt ycixpi co nyajpaatim ma Cristo. ⁸Miid co Dios miich ajcxy ti xychojccixy ti xyjihuiygixy, paady ycixp yi m'alma ajcxy ti patcixy nïdzoocin co ti mmibijccixy Jesucristo. Ca' nminaanim co tijaty ti mdungixy, paady ycixp yi m'alma ajcxy ti patcixy nïdzoocin. Hue' janchtiy Dios ti xymooygixy ninigoob ajcxy m'alma nïdzoocin. ⁹Ca' nminaanim huin'it jây ajcxy y'alma nïdzoocin paadip co oybi tungixy. Hue' janchtiy Dios jadu'n ci'm ti yaj'oyiï ninigoob nej jây ajcxy jëbi patcixy y'alma nïdzoocin, jigix ca' pin jëbi huaad amij agix ñayjihuiyïi. ¹⁰Com Dios ci'm ti oyduñ iich ajt njemybi tzinaayin jugy'ajtin miid je may'ajt huidibi Cristo ytuun co y'o'cy miid ajt nbocy ycixpi. Jadu'n Dios tuuñ miid iich ajt ycixpi, jigix jëbi nduunim oyjây'ajtin ma ajt ndzinaayin. Dios, jecy'ajty ca'ni naaxhuiñybi anajty chondacy, cojy macxy je tiy'ajt jadu'n nej yi' tzocy co nduunim oyjây'ajtin.

**Jotcujc cham n'ijtim miid Dios,
com Cristo xyajpocyhuaatzim**

¹¹Jadu'n miich ajcxy ocjâymejtzcodiï nej miich ajcxy anajty myajpatcixy co anajty ca'ni mmibijccixy Jesucristo. Ca' miich anajty ajcxy mjudfojâyity, e ni ca' miich anajty ajcxy

myajtiy'ajttiigixy nej huaad mnyadfiigixy Dios yjây. Paady ycixp yi judfojây ajcxy ymina'ñ co Dios je' yjây ajcxy, e miich ajcxy ca', miid yi'da'ajty co miich ajcxy ca' myajtiy'ajttiigixy. ¹²Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judfojây xycöbijccixy, etz ni ca' anajty mbadaangixy huidibi Dios y'ahuaniïy ma yi judfojây ajcxy, etz ni ca' anajty ti mjijp'ijxcixy ma Dios, etz ni ca' miich anajty ajcxy myajpatcixy ma Dios. ¹³Jadachambi, miich ajcxy huidibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo miid co yi' ñi'py teemy yojcy miid miich ajcxy mbocy ycixpi. ¹⁴Jesucristo ci'm yaj'oyiïy je tzip je capxy nej anajty iich ajcxy judfojây etz miich ajcxy huidibi ca' yjudfojâyity naymidzip'ajtim, e cham jotcujc n'ijtim. Jesucristo ci'm yajtigoy je judfojây ycötujcin huidibi anajty tzipcoj capxycoj ma iich ajcxy etz ma miich ajcxy. Jesucristo yajtügmuje judfojây, etz huidi ca' yjudfojâyity. ¹⁵Jesús miid yci'm ninicx yajtigoy je jecy'ajtpi cötujcin co oy yaj'ögyiï cruudzcíxy. Co Jesús y'o'cy, huin'it yajtügmuje judfojây etz huidibi ca' yjudfojâyity. Huin'it oy yaj'ahuimbity tügpicy jây jemybi huidibi Dios yjây'ajtip. E jadu'n ajcxy yajcijxy yajmay je tzip capxy. ¹⁶Co Cristo oy yaj'ögyiï cruudzcíxy, huin'it yajcijxy yajnaxxy je tzip capxy jadu'n nej yi judfojây anajty midzip'adyiï yi' ajcxy huidibi ca' yjudfojâyity. Etz nañ huin'it Cristo yajtügmuje yi judfojây

miid huidibi ca' yjudíoáyity.
Paady ycixp Dios ycóbíga'ñyii
judíoáy ajcxy etz huidibi ajcxy ca'
yjudíoáyity aguic jotcuje.

¹⁷ Je Cristo miin anajty ya
naaxhuiñ etz capxhuäcxy oybi
tiy'ajt jadu'n nej jēbi ajt nbaatim
jotcuje'ajtin ma Dios. Ycapxhuäcxy
anajty ma miich ajcxy huidibi ca'
yjudíoáyity, huidibi ca' anajty
miidity Dios ytiy'ajt. Etz nañ
jadu'n ycapxhuäcxy Dios ytiy'ajt
anajty ma iich ajcxy judíoáy
huidibi jamiid anajty Dios ytiy'ajt.

¹⁸ Miid co Cristo may'ajt ti tuuñ
co xy'adigiim xyjottigiim Dios
yjhuiñ ymic'ajt, paady ycixp
nidüg'óciy iich ajt nyajpaatim ma
Dios jadu'n nej tügpicy jäy, tanto
judíoáy etz nañ jadu'n huidibi ca'
yjudíoáyity. ¹⁹ Paady ycixp miich
ajcxy jadachambi myajpaady ma
Dios. Jadu'n miich ajcxy myajpaady
ma Dios tim jadu'n nej je jäy ajcxy
huidibi tzinaayb ma yci'mgajp, ca'
yjadu'nity nej adzinaaybi ajcxy.
Paady ycixp tú'ciy miich ajcxy
mnaygomájtzigixy ma Dios miid
judíoáy ajcxy. Jadu'n miich ajcxy
etz judíoáy ajcxy nipaady cham nej
jihuiy ajcxy mdügjuugy mdügmigüg.

²⁰ Miich ajcxy ti mmijpidaaccixy
je tiy'ajt huidibi Jesús y'apóstol
ajcxy ti capxhuäcxy etz je tiy'ajt
huidibi Dios y'ayucnajtzcaxiiby
ti capxhuäccixy. E yi' ajcxy
ytiy'ajt jadu'n nipaady nej poch'ijx
ma chondägy. E Jesucristo
yi' jēdu'n yajpatp nej tüg tzaa
huidibi jaccopicyip ma je poch'ijx
chondägy. ²¹ Dios jadachambi
tiempo ycojyp ymacxyp jadügpicy
jäy huidibi yjáy'adaanip huidibi

tügjijp mijpidaaccixy Cristo,
huidibi tú'ciy ijtcixyp miid
Cristo. Jadu'n jadayaabi tügpicy
jäy nipatcixy nej tüg tijc ma jäy
ajcxy Dios ojadajtcixy. ²² Miich
ajcxy myajpatp ma Cristo quipxyi
miid nidüg'óciy yi mayjay ajcxy
huidibi mijpidacp Dios etz huidijaty
mi'ijtp je Espíritu Santo ma ajcxy
yjot yhuinma'ñ, jadu'n miich
ajcxy mjuggy'ajtin nipaady nej Dios
chinaydac.

**Pablo yi' je' miid cötujcin
co capxhuäcxy Dios y'ayuc
ma pin ca' yjudíoáyity**

3 Iich Pablo, nyajpatpich
pujxtigoty miid co nduuñich
ma Jesucristo ytung ma miich
ajcxy huidibi ca' yjudíoáyity.
Paady ycixp nmibijctzooybich
Dios miid miich ajcxy m'oy'ajtin
ycixpi. ² Mnejhuiyb ajcxy com
Dios mijmay'ajt ti tuuñ miid
miich ajcxy ycixpi, paady yi' ti
xyajniibicyich ngapxhuäcxibich
ma miich ajcxy yi' y'ayuc ytiy'ajt.
³ Dios ti xyajnejhuiyich yi' ytiy'ajt
huidibi jecy'ajty yüch y'ijtp. Jada
tiy'ajt yinjaty hueeñjaty iich miich
ajcxy ti nnijayiygixy jayijp'aty. ⁴ Co
miich je necy mgapxip, huin'it ajcxy
mnejhuihuipy co iich nnejhuiyich
je Cristo ytiy'ajt huidibi ijtp yüch.
⁵ Jada tiy'ajt maabi Jesucristo, Dios
ca' ni pin yajnejhuiy jecy'ajty.
Jadachambi xii tiempo Dios miid je
Espíritu Santo yajnejhuiy Jesucristo
ytiy'ajt je Jesús y'apóstoles ajcxy
etz je Dios y'ayuc najtzcaxiiby
ajcxy. ⁶ Jada je' je tiy'ajt huidibi
jecy'ajty yüch anajty ijtp, co yi
jäy ajcxy huidibi ca' yjudíoáyity

ypadamyb ajcxy Dios y'oy'ajtin quipxyi miid yi judíoJay ajcxy, etz nañ jadu'n yi' ajcxy yajpaady ma Dios tú'ciy miid yi judíoJay ajcxy, etz nañ jadu'n yi' ajcxy padaangixy oybi huidibi Dios jecy'ajty yajnimay yi judíoJay co möhuaangixy pinjaty mibijccixp Jesucristo.

⁷Dios mijmay'ajt ti tuñ miid iich ninigoob co ti xyajñibicyich jada tung, e xymöyich mic'ajt co ngapxhuäcxibich Jesucristo y'ayuc ytiy'ajt oybi ma yi Jay ajcxy huidibi ca' yjudíoJayity. ⁸Iich jactimmudzip ma yi maybi mibijcpidijc ca'ydi jacpin, per ca' ñejity. Dios may'ajt oy'ajt ti tuñ ma iich, e ti xypidägyich ma yi' ytung co ngapxhuäcxych jada oybi tiy'ajt ma jacjadyi Jay ajcxy jigix jëbi ajcxy patcixy ma Cristo Jesús mij'oy'ajtin, huidibi ca' pin huinjihuüy jadu'ñyi ymijity. ⁹Dios ti xyajñibicyich co ngapxticxibich ma tüg'óciy Jay ajcxy je Dios y'ayuc ytiy'ajt oybi huidibi yüch anajty ijtp. Yi' je' je ayuc huidibi Dios ti cojy ti macxy jecy'ajty, jadu'n nej yi' tuna'ñ je oybi miid tüg'óciy Jay ajcxy. Yi' je' Dios huidibi ti yajcojtäy tüg'óciy tijaty ya naaxhuñ etz jiiby tzajpjoty yajpatp. ¹⁰Jadu'n Dios capxcödujcy co je tzajpjoty tzinaaybi ajcxy huidibi ane'min etz mic'ajt miid, tiy'ajt padaangixy ma yi mibijcpidijc jadu'n nej Dios mijhuinma'ñ canaagnax tuñ miid Jay ajcxy nidüg'óciy huidibi mibijccixp Cristo Jesús. ¹¹Jadu'n Dios ti cuyduñ miid ajt nHuindzin Jesucristo jadu'n nej jecy'ajty capxcödujcy. ¹²Miid co nyajpaatim ma Jesucristo paady ycixp agujc

jotcujc nmigapxim nmihuingonim Dios. Miid co nmibijcim Jesucristo paady ca' ndzigiiyim ndzo'yduunim ma Dios yhuinduu. ¹³Paady ycixp may'ajt nbijctzooyich miid miich ajcxy co ca' ñgi m'ixtigihuäccixy ma ajcxy mmibijcin. Etz ca'ajcxy xyñidajípy xyñimayípyich co tzaachypi nminaxyich nyajnaxyich miid miich ajcxy ycixpi. Com miid co ti nyajnaxyich tzaachypi miid miich ajcxy ycixpi, paady jëbi miich ajcxy oy'ajtin mbatcixy.

Cristo chojcpy yjihuiyb Jay ajcxy

¹⁴Com Dios mijmay'ajt ti tuñ miid judíoJay etz miid huidibi ca' yjudíoJayity, paady njatyhuingoxtinaaybich Dios, iich ajt nHuindzin Jesucristo yTeedy, e nmibijctzooybich Dios miid miich ajcxy ycixpi. ¹⁵Tüg'óciy tzajpjoty tzinaayb etz tüg'óciy naaxhuñJay huidibi mibijccixp Dios, jëbi nidüg'óciy yminaangixy: “Dios iich ajt nDeedy.” ¹⁶Paady nmibijctzooybich Dios Teedy miid miich ajcxy ycixpi, co Dios je huidibi mic'ajt etz oy'ajt ymiid mijcjee, co xymöhuipy mic'ajt ma ajcxy mmibijcin miid yi' yjihui'ñ ymic'ajt huidibi yajpatp ma ajcxy mjot mhuinma'ñ. ¹⁷Dios nmibijctzooybich miid miich ajcxy ycixpi co Cristo ymic'ajt yajpaadip ma miich ajcxy mjot mhuinma'ñ miid co mmibijccixy Cristo. Jadu'n Cristo ymic'ajt yajpaadip ma ajcxy mjot mhuinma'ñ, jigix jëbi miich ajcxy huidibi mmibijccixp Cristo, jëbi mdzójcixipy mjihuíyigixipy mijcjee huinixii huinitiempo je mibijcpidijc etz tüg'óciy

jacjadyii jäy. ¹⁸Nañ jadu'n Dios nmibijctzooybich miid miich ajcxy ycixpi co miich ajcxy etz tüg'óciy mibijcpidijc mnejhuñiygixipy jadu'n nej Cristo xychojcm xyjihuiiyim mijcajee. E yi' chojcin yjihuiiyin jadu'n nipaady nej tüg tijc huidibi jac cixip jac mijip, jac yooñip jac ciicyip ca'ydi ni huidi tijc. ¹⁹Nmibijctzooybich Dios co xyajnejhuñiygixipy xyajhuinjhuñiygixipy nej Cristo xychojcm xyjihuiiyim mijcajee nidüg'óciy iich ajt, ixti ca' huaad nhuinjhuñiydaayim jadu'n nej Cristo xychachchojcm xychachjihuiiyim. Nmibijctzooybich Dios co xypubéjtcixip, ixti mabaad mmiid'ajttaaygixy Dios y'oy'ajtin.

²⁰Jadachambi, cömay Dios y'ity huidibi mic'ajt miid, etz huidi yejcp mijcajee jac'anaxy ca'ydi nej njapijctzoohuim etz nej njahuinmaayim, miid je ymic'ajt ycixpi huidi tumb ma iich ajt. ²¹Huen tüg'óciy mibijcpidijc ajcxy jäymejtzcixy ojadájtciy Dios etz Cristo Jesús jabom jabom huinixii huinitiempo. Jadu'n jada. Amén.

**Tú'ciy n'ijtim miid
Espíritu Santo ycixpi**

4 Nyajpatpich pujxtigoty miid ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzináaygixipy jadu'n nej mihuaad jäy chinaaygixy huidibi Dios ti yhuin'fjixigixy, com Dios miich ajcxy ti xyhuin'ijxcixy. ²Pidaaccix mjot mhuinma'ñ yung naxy, nicy xeemy jäy'ajtcixy, naymecxtújcigix miñ xyipy, naymi'oyjäy'ajtigixy,

jigix ñiguëxigip co mnaychójcgixy mnayjihuiiyigixy miñ xyipy.

³Miid'adipy ajcxy mjot mhuinma'ñ tú'ciy miid je Espíritu Santo ypubejtin jigix jëbi mdzinaaygixy jotcujc ca' ma tzip capxy.

⁴Nidüg'óciy mibijcpidijc tú'ciy yajpatcixy ma Cristo etz tügpajc Espíritu Santo huidibi yajpaady ma ajt njot nhuinma'ñ. Dios ti xyhuin'ijxim, jigix jëbi quipxyjaty njijp'ijxtaayim je oybi huidibi nbadaanim jiiby tzajpjoty. ⁵Ji yajpaady tügpajc ajt nHuindzin Jesucristo, etz tügpajc je ayuc tiy'ajt huidibi jëbi nmijpidaacim, etz tügpajc nniibejtim miid Jesucristo yxi. ⁶Ji yajpaady tügpajc Dios Teedy huidibi cuendi'ajtp yajtzinaayb nidüg'óciy mibijcpidijc. Yi' je' huidibi nihuindzin'ajttaayb. Yi' je' huidibi may'ajt tumb miid nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinma'ñ.

⁷Dios may'ajt oy'ajt ti tuñ miid nidüg nidüg iich ajt co Cristo xymooyim mic'ajt, jigix jëbi nidüg nidüg tuunipy Dios ytung nej ypadyii. ⁸Paady ycixp jaybety ymiñ ma Dios jadu'n ymina'ñ:

Co Cristo ypättigiyy tzajpjoty, chi ymiidpättigiyy may machjäy, e nañ jadu'n Cristo moy jäy ajcxy mic'ajt (dones).

⁹¿Nej co jadu'n Dios y'ayuc yminañ co je Cristo ypättigiyy tzajpjoty? Hue' je' jadu'n yminañ miid co je Cristo jayijp ycidacy etz ooy ayooy ya naaxhuñgíxy. ¹⁰Je Cristo yi' je' huidibi cidaac ya naaxhuñ choon tzajpjoty, nañ jadu'n ypättigiyy jadüg'oc tzajpjoty

jactim'o'c'am. E yi' je' ymic'ajt yajpatp ma tüg'óciy huidijaty jiiby tzajpjoty etz tüg'óciy huidijaty ya naaxhuiñ. ¹¹Je Cristo ymooygixyp nidüg nidüg yi' ytumbi mic'ajt. Nijējity mooygixy mic'ajt jēbi nidiy'ajt'ajtigixy co je' je' je Cristo. Nijējity mooygixy mic'ajt jēbi najtzcaxhiygixy Dios y'ayuc. Nijējity mooygixy mic'ajt jēbi capxhuāxcixy yi' y'ayuc. Nijējity mooygixy mic'ajt jēbi capxhuijicixy yi mibijcpidijc miid Dios ytiy'ajt. Nijējity mooygixy mic'ajt jēbi yaj'ixpijccixy Dios ytiy'ajt. ¹²E jadu'n je Cristo mic'ajt moydaaygixy yi' yjāy, e jadu'n yajni'ixiydaaygixy miid ytung ycixpi. E miid yi' ajcxy ytung yjacyujcpedipy yi mibijcpidijc y'ixpijcin, ixti mabaad jac miid'adipy ajcxy Cristo y'oy'ajtin. ¹³Jadu'n Cristo mic'ajt xymooyim, jigix jēbi nidüg'óciy iich ajt ytügiyim nmibijcin, etz nañ jadu'n quipxyjaty n'ixpijctaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot nhuinma'ñ, nmi'ijtim Jesucristo ytiy'ajt cixy ca'pxy. ¹⁴Ca' n'idaanim miid ajt nhuinma'ñ nej pi'ctijc yhuinma'ñ ymiidity. Je pi'ctijc ajcxy janam jadzojc yhuinma'ñ ytigajtcixy. Jadu'n ajcxy nipaady nej je miy huidibi je poj yajpojmiym yajpojxiipy. Co cixy ca'pxy nmiid'ajtim Cristo ytiy'ajt, ca' pinjaty xyhuin'iinim miid huing ayuc oymibijcnip huidibi ca' yjanchity. ¹⁵Hue' janchtiy ngapxim je tiy'ajt tiybi miid tzojcin jihuiyin, jaydēbi njacyecim ajt nmibijcin etz njacnejhuiyim tüg'óciy Cristo ytiy'ajt jadu'n nej ytuuñ

ya naaxhuiñ, je Cristo huidibi nigohuajc'ajtp tüg'óciy mibijcpidijc. ¹⁶Cristo etz je mibijcpidijc nipatp nej tüg ninīcx. Cristo ñipatp nej je ninīcx cohuajc huidibi ane'mb etz mic'ajt mooyb je ninīcx. Etz yi mibijcpidijc ñipatp ajcxy nej je ninīcx huidibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huidibi yajtügiyip ajcxy ymibijcin etz nañ jadu'n yaj'ijtigixy tügumucy. Nidüg nidüg mibijcpi ymic'ajt patcixy ma Cristo, jēbi tungixy Cristo ytung nej ypadyii. E jadu'n yeecixy nidüg'óciy ma ajcxy ymibijcin, etz nañ jadu'n yajyeecixy chojcin yjihuiyin miid ymigügtijc.

Je jemybi jugy'ajt huidibi nbaatim ma Cristo

¹⁷Paady ycixp nnimāyich miich ajcxy etz nyajni'bijccixy miid ajt nhuindzin Jesucristo ycötujcin, co ca' huaad mdungixy loci huinma'ñ huidibi ca' choubaady ma Dios, jadu'n nej jacjadyii jāy ytungixy huidibi ca' mijpidaaccixy ajt nHuindzin Jesucristo. ¹⁸Ca' huaad mdzinaaygixy jadu'n nej jacjadyii jāy ajcxy chināy miid loci huinma'ñ. Ca' ajcxy yajpaady ma Dios, je huidibi jugy'ajtin yejcp huinixibi. Ooy ajcxy yjotjuuñity, ca' ajcxy ixpiğaangixy Cristo ytiy'ajt. ¹⁹Ca' ajcxy ti tzo'ydu'n jihuñy co ytundigooygixy. Ooy ajcxy minicxnajxcixy yi jibic-huinma'ñ. Ooy ajcxy nijot'ajtcixy mijcajee co tūngixipy tüg'óciy tijaty jibic-huinma'ñ. ²⁰Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy

Cristo ytiy'ajt, ²¹pen janch miich ajcxy ti mmidoogixy yi' y'ayuc, pen ti m'ixpijccixy je tiy'ajt huidibi yajpatp ma Cristo. ²²Ti miich ajcxy m'ixpicy co copicy m'ixmájtzcixipy yi jibic-huinma'n nej anajty mnijot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy miid je jibicpi huidibi anajty ajcxy mnijot'ajtcixyp, ci'm anajty mnayhuin'finigixy. ²³Ixmajtcix jibicjot jibic-huinma'n. Pidaaccix mjot mhuinma'n co mguydunaangixy Cristo ytiy'ajt jemybi. ²⁴Miid'ajtcix jemybi jot jemybi huinma'n com Dios ti yajtigajch huinjemy ajcxy mjot mhuinma'n miid tudägy'ajtin etz huädz'ajtin.

²⁵Paady ycixp ca'huaad m'iindaaccixy, nidüg nidüg cápxcix huidibi janchip miid migügtijc, miid co quipxyjaty nyajpaatim ma Jesucristo.

²⁶Pen miich ajcxy mmijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjäydigooygixipy yi mjotmädi yajijp ca'ni anajty xii ycidacyñi. ²⁷Ca' mnayyéjcgixy ma je mujcu' co je mujcu' xymimadägiy.

²⁸Yi jäy ajcxy huidibi meetzcixp, huen ixmajtcixy meedzii, etz ijxtähuipy ytung. Co ytunipy ma ci'mdung jëbi pubedipy ajcxy ymigügtijc huidibi yajmayajtcixp tijaty.

²⁹Ca' mgápxcixipy jibic ayuc. Cápxcix oy ayuc huidibi jëbi migüg ajcxy jäygidaaccixy, huidibi pubejtp etz yajyeegy je mibijcin,

huidibi yejcp oy'ajtin ma pin ajcxy amido'ijtp. ³⁰Ca' huaad mgapxcixy mmiydaaccixy ayuc huidibi yajjotmaybijcp je Espíritu Santo huidibi Dios yjë'ajtpy. Je Espíritu Santo huidibi miich ajcxy miid ma mjot mhuinma'n, yi' je' huidibi tiy'ajt yejcp co miich ajcxy Dios yjäy'ájtigixy, co anajty Cristo ymiñ ya naaxhuin jadüg'oc huin'it mbadaangixy jugy'ajtin etz tzinaayin huidibi ca' ycixipy ytigoyípy ni mina.

³¹Yajqueeccix yi jibicpi ma ajcxy mjot mhuinma'n, jadu'n nej co mjot mhuinma'n ta'm mjihiuigixy, jadu'n nej co tzojc mjotma'tcootcixy, jadu'n nej co mnaymijotmá'tigixy, jadu'n nej co mnayhuin'ójiigixy nayijp'ójiigixy. Ca' huaad mmigüg mnigapxcixy mni'ojiigixy. Ca' jibicpi mnijot'ajt'adiitzcixy miid ajcxy mmigüg ycixpi. ³²Hue' janchtiy oybi mhuinmáaygixipy miid mmigüg ajcxy ycixpi. Nayba'ayóohuigixy nidüg nidüg. Nayméecxigix nidüg nidüg. Com nañ jadu'n Dios ti huinmecxy miich ajcxy mbocy miid co myajpatcixy ma Cristo.

Nej jëbi chinaaygixy yi Dios yjäy ajcxy

5 Com miich ajcxy ñipatpy nejjihiuñ Dios y'ung'ájtigixy, e Dios ooy xychojccixy xyjihiuigixy, paady copicy naychójcigixy nayjihiuigixy miñ xyipy, jadu'n nej Dios ti xychojccixy ti xyjihiuigixy. ²Jabom jabom ma mdzinaayin naychójcigix nayjihiuigixy nidüg nidüg, tim jadu'n nej Cristo xychojcin

xyjihuiiyim, e yjugy'ajt yejcy miid
ajt nbocy ycixpi, e jadu'n Dios
jäygidacy nej Cristo ytuñ.

³Miid co miich ajcxy Dios
xyjäy'ájtigixy, paady tzinaaygixy
miid huädz mjot mhuinma'ñ.
Ca' huaad m'oc'iibáatcixyñi
m'occapxpáatcixyñi yi töxyjäy
migapxtigoyii, etz yi jibic ayuc
capxii, yi jibic-huinma'ñ nijot'adii
etz yi meen adzogii. ⁴Miid co
mDios miich ajcxy xyjäy'ajtp,
paady ycixp ca' huaad mgápxcixipy
ayuc huidibi tzo'ydu'n yejc, ni
ca' huaad mgápxcixipy huidi ca'
y'oyjäygidaacnity, etz ni ca' huaad
mguxiiccixy m'aniidaaccixy, com yi
jibic ayuc ca' Dios jäygidägy. Tzoc
yajnajxim jäygidaacin ma Dios
com Dios ti xyajhuaatzim ajt njot
nhuinma'ñ. ⁵Janch tiy'ajt jada co
pinjaty tundigooyb miid huingbi
töxyjäy, pinjaty jibic-huinma'ñ
miid, ca' ajcxy padaangixy
pidägy etz oy'ajtin ma Cristo
etz ma Dios y'ane'min. Pinjaty
meen adzojcp, Dios ca' tzocy, tim
jadu'n nej yi' ca' tzocy pinjaty
ojadajtp tzaadzech etz quipychech.
⁶Ca' mnayyéjcigixy co jäy ajcxy
xyhuin'fingixipy miid ayuc huidibi
ca' ytiy'ajtity ca'p choubaady.
Miid co jäy ajcxy capxcixy ayuc
huidibi ca' ytiy'ajtity, paady ycixpi
Dios tzaachytuna'ñ tüg'óciy jäy
ajcxy huidibi capxycömidodacp
yi' y'ayuc. ⁷Ca' huaad miich ajcxy
mnaymigüg'ájtigixy, ca' miid
mnayyöymújcigixy yi jadu'mbi jäy
ajcxy huidibi ca' capxymidoogixy
Dios.

⁸Jayijp ca'ni anajty mmibijccixy
Cristo, ca'ni anajty Cristo ytiy'ajt

ajcxy mnejhuiiy, e jadu'n nipaady
anajty nej jihuüy myajpaady
ajcxy agootztuum. Jadachambi
mnejhuiygixyp Cristo ytiy'ajt,
e jadu'n nipaady nejjihuüy
mdzinaaygixy ma tüg tiicxin.
Paady ycixp jatyim cuydungixyp
Cristo ytiy'ajt ma yi mdzinaayin
mjogy'ajtin ajcxy, jadu'n nej jëbi
huaad quëxigy co mmibijccixy
Cristo. ⁹Co nmiid'ajtim Cristo
ytiy'ajt, chi nduunim huidibi
y'oyip, huidibi tudägyip, huidibi
tiy'ajtip. ¹⁰Ixpijccix je tiy'ajt huidibi
Dios yjäygidacpy. ¹¹Ca' miich
ajcxy mnaymigüg'ájtigixy miid
yi jäy ajcxy huidibi yajpatcixp
agootztuum, huidibi tungixy
huidibi Dios ca' jäygidägy. Miich
ajcxy capxhuijcix miid Dios ytiy'ajt
yi' ajcxy huidibi agootztuum
tzinaayb. ¹²Tzo'yduunim ajt co
jay nigapxcixy nimiydaaccixy
je jibicpi huidibi ajcxy ytummyb
ayüch ameech. ¹³Co n'ixquixim yi
jadu'mbi jäy ajcxy ayuc miid Dios
y'ayuc, chi niguëxigy pen janch
tiy'ajt o pen ca' ytiy'ajtity, jadu'n
nipaady nej ti nyajpidzimim je
ajcxy ayuc ma yi agootztuum, etz
nbidaacim ma yi tiicxin. ¹⁴Paady
ycixpi Dios y'ayuc jadu'n yminañ:

Mäyhuijip miich ajcxy huidibi
jadu'n nipatp nejjihuüy
mdzachmaagixyp. Jugypijccix
miich ajcxy huidibi jadu'n
nipaady nejjihuüy ti m'öccixy.
Cristo xycodfíxcixipy miid yi'
ytiy'ajt.

¹⁵Paady naygüend'ájtigixy
huidibi tiy'ajt yajtungixp ma yi
chinaayin. Tzinaaygix jadu'n
nejjihuüy mnejhuiygixy Cristo

ytiy'ajt, e ca' mdzinaaygixy jadu'n nej huidibi ajcxy ca' nej jihuüygixy Cristo ytiy'ajt. ¹⁶Ni'ixi'ijtcix jabom jabom jëbi mguydungixy Cristo ytiy'ajt. Jadachambi xii tiempo mayjäy ytundigooygixy miid Cristo ytiy'ajt. ¹⁷Ca' loci huinma'n myajtungixy, per nejhuüygixyp nej Dios tzocy co mdúngixipy. ¹⁸Ca' huaad m'ijtcixy amügy jäy, com yi jocnií xyajníxcixipy ayo'nduum. Nígi oy m'ijtcixy Dios yjihuü'n ymic'ajt may'amy ma ajcxy mjot mhuinma'n. ¹⁹Naymigápxigixy miñ xyipy miid yi salmo ayuc, miid yi himnos. Huin'ligix Dios miid je iy huidibi je Espíritu Santo xymooygixyp. Huin'ligix etz ojadajtcix Dios cixy jot huinijot. ²⁰Jatyim yajnaxcixy jabom jabom jäygidaacin ma ajt nDios Teedy ma ajt nHuindzin Jesús yxií, miid tüg'óciy ycixpi nej ndunim n'ayoohuim.

**Nej huaad chinaaygixy
pinjaty picychinaaygixy**

²¹Miid co miich ajcxy mhuindzigiy Dios, paady ycixp miich ajcxy mnayyajmij'ajtigixy mnaygapxymidóohuigixy miñ xyipy.

²²Miich ajcxy töxyjäydijc yajmij'ajtcix capxymidoogix yi mñäy ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo. ²³Com je töxyjäy ñäy nigohuajc'ajtp ma ytöxyijc ymiñ, tim jadu'n nej Cristo nigohuajc'aty ma yi mibijcpidijc ymiñ. Yi Cristo yi'je' huidibi nihuänamb yajnídözögamb yi mibijcpidijc. ²⁴Tim jadu'n nej yi

mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidóogixipy yi ñäy ajcxy.

²⁵Nañ jadu'n tzocy co je yëydijc huen tzocy jihuüy ytöxyijc, tim jadu'n nej Cristo tzocy jihuüy yi mibijcpidijc, e paady ycixp yejc yi' yjugy'ajtin miid yi' ajcxy ycixpi. ²⁶Cristo yejc yjugy'ajtin miid je mibijcpidijc ycixpi, jigix jëbi huinmecxy ajcxy ypocy, yajhuaatzip ajcxy yjot yhuinma'n. Cristo yajhuaatzi yi mibijcpidijc ajcxy yjot yhuinma'n miid yi'y'ayuc etz co niibejt ajcxy miid nii. ²⁷Jadu'n Cristo yajhuäch yi mibijcpidijc ajcxy yjot yhuinma'n, jigix jëbi ajcxy nayguëxigiiyb ma yi' yhuinduu miid huädz yjot yhuinma'n. Je mibijcpidijc ajcxy nipaady nej tüg nijen huidibi huädzip, ca' ma ytiy ymächity.

²⁸Jadu'n tzocy co je yëydijc huen tzocy jihuüy ytöxyijc tim jadu'n nej ci'm naychogyii. Yi yëydijc huidibi tzojcp jihuüyb ytöxyijc nañ jadu'n ci'm ñaychogyii. ²⁹Ca' ji ni pin huidibi ca' ñaychogyii ci'm. Hue' janchtiy ycuend'ajtpy etz yajcüxyii yajpedyii yci'm ninícx, tim jadu'n nej jäy ajcxy cuend'ajtcixy yci'm ñinícx nañ tim jadu'n Cristo ycuend'ajtpy yi mibijcpidijc.

³⁰Jadu'n Cristo cuend'ajtpy yi' yjäy, com jadu'n ajcxy nipaady nej yi' ñinícx. ³¹Com copicy je yëydijc tzogírp jihuühuip ytöxyijc jadu'n nej Cristo tzocy jihuüy yi mibijcpidijc. Paady ycixp je yëydijc ixmadzipy ytaj yteedy, e ypudigíhuipy ytöxyijc, e jadu'n ajcxy chinähuipy nej jihuüy ytügpaicity. ³²Ooy

chachmijhuinma'nñity jada tiy'ajt huidibi yüch anajty ijt, e yi' iich jadu'n tijpy yi Cristo etz je mibijcpidijc. ³³Cuendipijccix jada tiy'ajt co nidüg nidüg miich yëydijctijc ajcxy huidibi pijccix copicy mdzogipy mjihuïhuipy ajcxy mdöxyijc, tim jadu'n nej ci'm ajcxy mnaychogyii, e nañ jadu'n copicy co nidüg nidüg töxyjäydijc yajmij'adipy näy.

6 Pi'ctijc ajcxy huidibi mibijcp Jesucristo, copicy mgapxymidoohuipy ajcxy mdaj mdeedy, com tiy'ajt jadu'n. ²Yi Dios ycötujcin huidibi minaamb: "Yajmij'ajtcix mdaj mdeedy", yi' ooy ytimycopicyity. Nañ jadu'n co nguuyduunim jada cötujcin, huin'it Dios jecy xyajtzinaayim. ³Co miich ajcxy jadu'n myajmij'adipy mdaj mdeedy, huin'it Dios xymöhuipy ajcxy jotcujc'ajtin, e nañ jadu'n xyajtzinaáyigixipy jecy ya naaxhuin.

⁴E miich ajcxy huidibi ungdeedy'ajtcixp, ca' nigoo myajjotma'tcotcixy yi m'ung ajcxy. Ane'mgix yajyeccix yi m'ung ajcxy miid Dios y'ayuc ytiy'ajt, jaydëbi capxymidóogixipy ajcxy Dios.

⁵Miich ajcxy huidibi tumbi'ajtp ya naaxhuin, capxymidoogix yi mhuindzin ajcxy, etz tungix miid tudägy'ajtin, etz yajmij'ajtcix etz tzigiiygix. Tim jadu'n nej jihuïy mgapxymidoogixy yi mHuindzin Jesucristo.

⁶Tungix yajxon miid ajcxy mhuindzin. Ca' janch xypaat oy mic mduungixy co ajcxy mhuindzin jim xyhuindiicxcixy, e chi co je' yjihuäcni, chi nigoo mhuäccixni

mdinaáyigixni. Tungix jadu'n nej huaad jäy ytuungixy yi huidibi mijpidaaccixp Jesucristo. Tungix cixyot huinijot jadu'n nej Dios tzocy mdúngixipy.

⁷Tumbidijc ajcxy, tungix mdung cixyot huinijot, tim jadu'n nej jihuïy mdungixy je Huindzin Jesucristo ytung, e ca' yjäydungity.

⁸Mnejhuïyb miich ajcxy co ajt nHuindzin Jesucristo oybi möhua'nñ nidüg nidüg jadu'n nej ti ytuuñ, ca' ñejity pen yci'mdung ytumyb, o pen ytumb miid tüg huindzin.

⁹Miich ajcxy huidibi nihuindzin'ajtp tumbidijc, oy'amy ane'mgix mdumbi ajcxy. Ca'm'adzigiíygixipy ca' mdzaachytúngixipy. Ajihuïyigixy co miich ajcxy etz nañ jadu'n mdumbi ajcxy miid ajcxy mHuindzin tzajpjoty, e yi mHuindzin tzajpjoty quipxyjaty tiyduna'nñ nidüg'óciy miich ajcxy.

Je mic'ajt huidibi je mibijcpidijc ajcxy ypatcixyp miid Dios yjihui'n

¹⁰Jadügñax, migügtijc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt miidity, paady jëbi miich ajcxy mbatcixy yi mmic'ajtin ma yi'. ¹¹Naygohuaanigixy miich ajcxy ma je mujcu' miid tüg'óciy tiy'ajt huidibi Dios xymooyim, huidi miid naygohuaanim ma je mujcu', e jadu'n ca'ydi je mujcu' xymimadaacim miid anii. Jadu'n Dios ytiy'ajt nipaady nej tujt etz pujxnijen huidibi soldados ajcxy miid naygohuaangixy tzipjoty. ¹²Hue' janchtiy xymidzip'ajtim

poj naaxhuiñ, ca'oybi, mujcu'dijc, etz tüg'óciy mic'ajt miidpi huidibi midzip'ajtp Dios ya naaxhuiñ etz jiiby tzajpjoty, ca'p iich ajt nmidzip'ajtim naaxhuiñjáy.

¹³Paady ycixp yajtúngxixy tüg'óciy mic'ajt etz tiy'ajt huidibi Dios ti xymooygixy, jigix jëbi mmimadaaccixy je ca'oybi co anajty xyajtundigoyaangixy. E jadu'n jëbi mimadaaccixy je ca'oybi miid ajcxy mmibijcin. E co anajty ti mmimadaactaaygixy, huin'it m'ijtcixipy mic ma ajcxy mmibijcin.

¹⁴Ca' m'ixtigihuäccix ma ajcxy yi mmibijcin. Nayñi'ixfiygix miid Dios ytiy'ajt, jadu'n nej jáy ajcxy ñayhuiindädzigixy co ytunaangixy. Nayñi'ixfiygix tim jadu'n nej soldados ajcxy ñayñi'ixfiygixy miid pujx nijen ma caach co chiptunaangixy. ¹⁵Nayñi'ixfiygix miid Dios y'ayuc, jigix jëbi ajcxy nicxy mgapxhuäcx Dios y'ayuc huidibi jotcuje'ajtin yejcp. Co jadu'n mdúngxipy, jadu'n nibaadip tim jadu'n nej soldados ajcxy ñayñi'ixfiygixy co yajtigiigixy yzapato co ytüyöyaangixy. ¹⁶Yi' huidibi jac copicyip ca'ydi jac ni ti, mibijccix tiydudägy Jesucristo. Miid ajcxy yi mmibijcin jëbi mnaygohuáanigixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumyb co ñaygohuáanigix ma je tip huidibi yajnajtziibiibiy miidi jiin. ¹⁷Nayñi'ixfiygix miid Cristo ytiy'ajt huidibi miid ajcxy m'alma xyajnidzoocip, tim jadu'n nipaady nej soldados ajcxy ñaygohuáanigixy co pidaaccixy ypujx cöjup co

chiptunaangixy. Naygohuáanigix miich ajcxy miid Dios y'ayuc huidibi jadu'n nipatp nej tüg espada huidibi je Espíritu Santo ti xymooygixy. ¹⁸Mibijctzoogix Dios miid tüg'óciy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom miid je Espíritu Santo ypubejtin. Huijy ycuje m'ijtcixipy, ca' m'jotmetzcfiygixipy. Mibijctzoogix Dios miid tüg'óciy mibijcpidijc ajcxy ycixpi. ¹⁹Nañ jadu'n mibijctzoogix Dios miid iich ycixpi, co huen xymöyich ayuc etz jotcuje'ajtin, jigix jëbi ngapxhuäcxibich huinmic jotmic yi' y'ayuc ytiy'ajt huidibi ca' pin jecy'ajty nejhuiygixy. ²⁰Dios ti xyajni'bicyich jada tung jëbi nyajnicxyich yi' y'ayuc ytiy'ajt ma je mayjáy ajcxy. Paady ycixp nyajpaadyich pujxtigoty cham. Tungix may'ajt mibijctzoogix Dios miid iich ycixpi co xyajjotmicpigipyich jigix jëbi ngapxhuäcxich yi' y'ayuc huinmic jotmic.

Capxpooctxin huidibi cogixiiyñip

²¹Ooy ndzocy njhuiyich je Tíquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tíquico miich ajcxy xyajmiidmiydägiy tüg'óciy je tiy'ajt nej nyajpaadyich ya, etz tüg'óciy tung huidibi ya ndumybich. ²²Nguexaamybich Tíquico ma miich ajcxy jigix jëbi xymiidmiydägiy ajcxy jadu'n nej nyajpaadyich ya, e miid jada tiy'ajt jëbi miich ajcxy m'jotcugiigixy.

²³Huen Dios Teedy etz ajt nHuindzin Jesucristo may'ajt

tunipy miid miich ajcxy, jigix
jēbi jotcuje mdzinaaygixy, etz
nañ jadu'n jēbi mnaychójcigixy
mnayjihuíyigixy miñ xyipy, etz
jigix jēbi mjacmibijccixy Cristo.

²⁴Huen Dios may'ajt oy'ajt

tunipy miid miich ajcxy huidibi
yajmij'ajtcixp ajt nHuindzin
Jesucristo huinixii huinitio. E
ca' m'ixmájtzcixip nimina nej ajcxy
mijpidaaccixy Jesucristo. Jadu'n
jada. Amén.